



*Rabu, 07 April 2021*

**Ogen: Johanes 21 : 1-14**



*"Nggo Sikap Kerina"*



**I**bas kita ndalani kegeluhen enda, rusur kel reh kebiaren. Erbage-bage kebiaren e eme kap : mbiar la ersen, mbiar la man ntabeh, mbiar la tersekolahken anak-anak, mbiar la kena erga sinuan-nuan, mbiar la dat dahin, mbiar la iergaken kalak, ras sidebanna. Selaku manusia, kebiaren e wajar kel terjadi, tapi ula sempat kebiaren e mabai kita lanai tek nandangi penampat Dibata, sebab biasana kebiaren e nggo belinen ngkuasai pusuhta asangken sigejapken kerna penampat Dibata e, seh maka er urakna kinitekenta nandangi kebiaren i bas perbebenta e.

Renungenta sendah mabai ketetapan ukur i bas ngalaken si reh bas geluhta. Nggo sikap kerina, nina Yesus banta erpalasken Johanes 21:1-14. Paksa ajar-ajar Yesus njala nurung bas Dano Tiberias, la idatna nurung sada lah gia. Emaka icidahken Yesus me kuasaNa guna nampati ajar-ajarNa e. (Enda me petelu kaliken Yesus ncidahken diriNa man ajar-ajarNa kenca Ia ipekeke i bas simate nari). Itegu-tegu Yesus me ajar-ajarNa guna ngamburken jala ku tengah dano. I bas kepatuhen ajar-ajarNa e, mbue kel idat ajar-ajarNa nurung ndai, seh maka lanai terangkatsa ban buena. La ngenca nurung siidatken ajar-ajar e tapi nggo ka isikapken Yesus kerna rara api ras roti i tepi dano. Mbelin kel perbahanen Yesus man ajar-ajarNa. Nggo sikap kerina kai siisuraken ajar-ajar e, si la terukurisa pe enggo isikapken Yesus. Bagem Yesus mpeteguhi kinteken ajar-ajarna gelah ulanai aru ate ndalani kegeluhen ras tetap ukur ngikutken Yesus si enggo keke I abs si mate nari. Adi ras Yesus kerina enggo sikap.

Enda sada pengajuk gelah kita pe paguh bas erkiniteken man Yesus si enggo keke e. Ia ngasup ras nikapken keperluan, ietehNa kai si lit i bas pusuhta, iangkaNa sura-suranta, ietehna kai si man bahanen guna kiniulinta sekalak-sekalak.